

1

feilâtün feilâtün feilâtün feilün KASÎDE DER-HAKK-I FÂTİH SULTÂN MUHAMMED GÂZÎ

- 1 Subh-dem urs-ı bahâr içre zamân pîre-zeni  
Bezedi dürlü şükûfeyle arûs-ı çemeni
- 2 Gül-i ter yüzine pinhâni nazar kılmagıçun  
Kasr-ı sîminden açar revzene gör yâsemeni
- 3 Çeşm-i nergis zarar itmemegiçün hatmi dakar  
İdinüp gerdenine levh akîk-i Yemen'i
- 4 Gül-i ter nâhun-ı hârıla yüzün tırmaladı  
Subh-dem dişledi şebnem çü leb-i nestereni
- 5 Semen-i sîm-beden gül yüzini yumagıçun  
Sebzede nergis elinde dutar altun legeni
- 6 Kîse-i gonceye mühr urdı anunçun şeh-i gül  
Ki zer ü la'lin ugurlamaya gülşen diken
- 7 Jâle düşdükde seher lâleye san dilberdür  
Kim dakar zînetiçün gûşına dürr-i Aden'i
- 8 Çün-ki bahrî bigi yüzmek dilemez lâle niçün  
Su kenârında durur başa sarup pîrehehi
- 9 Oluban bencileyin bâd-ı sabâ âşüfte  
Dost kohusın alam diyü tolaşur semeni
- 10 Ol temâşâyâ nazar kılup okurdı gördüm  
Sûzıla bu gazeli bülbül-i şîrîn-sühanî
- 11 Görmeyelden berü sen gül-ruh u gonce-deheni  
Dil ü cân bülbülünün dâr-ı hazendür vatani
- 12 Çün semen yüzüne öykündi sabâ ol denlü  
Çüb-ı ter urdı ki hep gülgül olupdur bedeni
- 13 Leb ü zülfün gamıla öleni zemzemle yuyup  
Perde-yi Mekke'den itmek gerek ana kefeni
- 14 Çün lebünden şeker ugurladı şîrînlık anı  
Asdılar düzd bigi boynına dakup reseni
- 15 Gonce-veş çâk-ı kabâ itmişem ü yaşumı cûy  
Görelî sen yüzi gül serv-i semen-pîrehehi
- 16 Dest-gîr olmışiken âşık-ı üftâdelere  
Pây mâl itme ser-i zülf-i kecün gibi beni
- 17 Ger dil ü cânı gözün gâret idüpdür nite-kim  
Düşmenün kalbini dehrün şeh-i leşker-şikeni
- 18 Âftâb-ı felek-i izz ü meh-i devlet ü câh  
K'eyledi nûrıla rûşen bu zemîn ü zemeni

- 19 Hân Muhammed kim anun adli sehâbı nemile  
Tâzedür sebzegeh-i şer'-i Resûl-i Medenî
- 20 Rezm-i Rüstem idicek alsa ele tîr ü kemân  
Ugradur sehm-i kazâ vü kadere Tehmeten'i
- 21 Düşmene ger dokına sengi kemân-mühresinün  
Top-veş yıkar eger burcisa dahı bedeni
- 22 Terbiyet ger idesin peşşeye kuvvet buluban  
Götüre mûr-sıfat zûrıla sad Pîlten'i
- 23 Bîd-i huşke ger ire lutfı nesîmi yaşarup  
Şecer-i nahl bigi bite hemân-dem pereni
- 24 Husrevâ çerh günâh itdi meger eşigüne  
Ki gelür gerdenine subhdan atup kefeni
- 25 Adlün âvâzı zihî k'oldı revân tîr-sıfat  
Dest-i kahrün bükeli ya bigi kadd-i fiteni
- 26 Düşmenün tıflını emzürdüğü dem dâye-yi dehr  
Zehr-i mâr olur anun sedy içinde lebeni
- 27 Hasmunun farkına ger gürzün ire tîr bigi  
Baş u ayagı belürmeye tola kan deheni
- 28 Ger adû gürbe-sıfat pençe ura sen şîre  
Ölmedin mûş bigi gûr içi ola vatani
- 29 İtdüğü hükmile Hak seni Süleymân-hâtem  
Bu ki râm ola senün emrüne dehr ehrimeni
- 30 Ol Hudâ hakkıyıçun kim yogıken eyledi var  
Âdem ü cinn ü melek arş u zemîn ü zemeni
- 31 Bende Adnî'nün i şeh dilegi budur niçe kim  
Şem'-i ezhârıla zeyn ola zemîn encümeni
- 32 Ehl-i diller çemen-i âlem içinde niçe kim  
Kadd-i cânâneye teşbîh ideler nârveni
- 33 Sûsenün tığına karşı niçe kim bâgda gül  
Sahn-ı pîrûze içinde duta la'lîn miceni
- 34 Ebr-i nîsân nem-i bârânıla niçe kim ide  
Gûşvâre sadefün gûşına dürr-i Aden'i
- 35 Eyleyüp devletile ömrünü pâyende Hudâ  
Sana bağışlaya ol iki güher sîm-teni

2

feilâtün feilâtün feilâtün feilün

- 1 Şekerün zehresini şehd-i lebün çâk eyler  
Kamerün çihresini mihr-i ruhun hâk eyler

- 2 Virmege lâıyk olam diyü nişânın lebünün  
Dehenin gonce gül-âbıla seher pâk eyler
- 3 Cüst ü cüy-ı kad-i servünle yaşum çâbükdür  
Râstı çok hareket merdümü çâlâk eyler
- 4 Zülfün effîsi dil ü câna ne gam ger ura nîş  
Ki lebün nûşı anun zehrini tiryâk eyler
- 5 Degme âkil ne bilür gün yüzi mâhiyyetini  
Tal'at-ı Leyli'yi Mecnûn olan idrâk eyler
- 6 Gözlerüm cüyı kenârında kıl iy serv karâr  
Nazar-ı âb-ı revân cânı ferahnâk eyler
- 7 Ay yüzün şevkine ser-geşte olan dürre-misâl  
Kendüzin gün gibi tâc-ı ser-i eflâk eyler
- 8 Leb ü haddün gamıla lâle vü gül Adni bigi  
Başına hâk koyup yakasını çâk eyler

3

fâilâtün fâilâtün fâilâtün fâilün

- 1 Gördüğümçe anberîn zülfün ruh-ı dildârda  
Mâr-ı müşk-efşân yatupdur sanuram gülzârda
- 2 Yâd kıldukça leb-i cân-bahşunı peydâ olur  
Gonce-yi şâdî gülistân-ı dil-i efgârda
- 3 İy gözüm nûrı budur eşigüne yüz sürdügüm  
Ka'be'yi her kim tavâf eylerse yanmaz nârda
- 4 Lâle haddünden meger gül reng ü bû ugurladı  
Kim dırahta saruban gezdürdiler bâzârda
- 5 Yalunuz cân aldugın fikr itme iy dil kıl hazer  
Dahı niçe hîle var ol turre-yi tarrârda
- 6 Zülfün iy meh-rû ruhundan oldugı pür-tâb bu  
Günde yatdukça olur kuvvet ziyâde mârda
- 7 Adniyâ dildâr gûşına münâsibdür hemîn  
Ol dürer kim var durur bu nazm-ı gevher-bârda

4

fâilâtün fâilâtün fâilâtün fâilün

- 1 Mihrünile âhum iy meh tâ Süreyyâ'dan geçer  
Eşk-i çeşmüm katresi mevc urdı deryâdan geçer
- 2 Âh kim kılmadı cânâ gönlüne nâlem eser  
Gerçi dirler âh-ı âşık seng-i hârâdan geçer
- 3 Açılır cân gülşeninde gonce-yi şâdî ne-dem  
Kim lebün fikri dil-i pür-hûn-ı şeydâdan geçer
- 4 Nişter-i gamzen niçün âşık kanın döker didüm

Didi kasdıla maraz kim ola sevdâdan geçer

- 5 Lâle haddünde arak gördükçe cânâ dir gönül  
Âb-ı güldür kim süzülüp sürh-ı vâlâdan geçer
- 6 Geçdüginçe âb-ı çeşmümden hayâl-i zülf-i dost  
San neheng-i nil-gündür oynayup mâdan geçer
- 7 Dilberâ ger hâk-i pâyun gire Adnî destine  
Cân u yâ devrân nedür Firdevs-i a'lâdan geçer

## 5

fâilâtün fâilâtün fâilâtün fâilün

- 1 Zülfüne benzer girü meşşâta olmuşdur sabâ  
Kim ayagunda dil ü cânlar yatur olup hebâ
- 2 Gönünile çün-ki yapdun bu dil-i vîrânemi  
Muhkem olısar bu kez kim sengile urdun binâ
- 3 Hâk-veş cânân yolında olmayan sâbit-kadem  
Yiridür ger bâd bigi deng ü sergerdân ola
- 4 Yüzünü ger şem'a teşbîh eyledümise günâh  
Yak beni pervâne bigi bu günâhıçun oda
- 5 Serv-kaddün-veş nigârâ olmayan yolunda râst  
Göreyin zülf-i kecün bigi yüzi olsun kara
- 6 Ay diler kim gün yüzünden hüsn ugurlaya gice  
Anunıçun revzenünden kasruna girer şehâ
- 7 Hatt u kaddün hasretinden ger ölürse Adnî'nün  
Sini üzre bitiserdür lâle vü mihr-i giyâ

## 6

mefâilün feilâtün mefâilün feilün

- 1 Seher yüzine habîbün çü zülf-i şâm irişür  
Şikâr-ı murg-ı diliçün hezâr dâm irişür
- 2 Aceb mi tâze vü ter olsa zülf-i müşkînün  
Îzârun âbına çün-kim ale'd-devâm irişür
- 3 Müdâm göreyin iy cân ciger kanın içsün  
Ki saht-rû oluban leblerüne câm irişür
- 4 Hevân odında vücûdum türâb olıyardur  
Revân olup çü gözünden dile sihâm irişür
- 5 Sarây-ı sînede çün-kim gamun ola mihmân  
Hezâr şevkile cân u gönüle kâm irişür
- 6 Benümle hem-kader olma rakîb eyle hazer  
Ve ger ne bil ki sana ansuzın kazâm irişür
- 7 Kaşun kemânına kurbân olursa Adnî ne tan  
Çü gamzen okı anun bagrına müdâm irişür

7

fâilâtün fâilâtün fâilâtün fâilün

- 1 Âlemün dürrile la'lin gözlerümden salmışam  
Tâ ki ıskun bahrına gavvâs oluban talmışam
- 2 Hâl-i anber-bârını gül yüzün üzre görelî  
Nokta gibi devr içinde bî-ser ü pâ kalmışam
- 3 Kanlu yaşum sırrımı fâş itdüğüçün âleme  
Acılıgıla anı gözden ayaga salmışam
- 4 Zülfünün sevdâsı zencîrin tolâyup boynuma  
Hayderî-veş kapuna deryûze için gelmişem
- 5 Devr içinde cür'a-yı câm-ı lebünden mest olup  
Adni'yem kim şîşe-yi nâmûsı taşa çalmışam

8

mef'ûlû / fâilâtün mef'ûlû / fâilâtün

- 1 Gülşende gül yüzünçün bülbül bigi terennüm  
Gerçi kim eyledüm çok hiç itmedün terahhum
- 2 Yüzün görürken ay u hurşide bakmadugum  
Budur ki su katında câyiz degül teyemmüm
- 3 Merhem yirine çeşmün zahm urdı yüregüme  
Yaşı çok ola bana merdümlik itdi çeşmüm
- 4 Kanlu yaşın akıdup def' itdi gönlüm odın  
İnsânlig olur işi anun kim ola merdüm
- 5 Yârun dehânı sırrın keşf idemez kimesne  
Yok yire Adniyâ sen hiç eyleme tevehhüm

9

fâilâtün fâilâtün fâilâtün fâilün

- 1 Cân cemâlün şem'inün pervânesidür dostum  
Dil müselsel zülfünün dîvânesidür dostum
- 2 Al emânet gönlümü cevrunle vîrân iyleme  
Kim senün hayl-i hayâlün hânesidür dostum
- 3 Cân u dil derd ü gamunla âşinâ olalıdan  
İki âlem anlarun bîgânesidür dostum
- 4 Yoluna cân u cihân virdüğüme budur sebeb  
Bana cevri itdüğünün şükrânesidür dostum
- 5 Kasr-ı cennet bigi ma'mûr olıyardur dâyimâ  
Ol gönül kim ıskunun vîrânesidür dostum
- 6 Kanuma gamzen susamışdı lebünden soraram  
Kim kaçan ol teşne kana kanasidür dostum

- 7 Ger terahhum eylemezsen Adni yüzün şem'ine  
Âkıbet pervâne bigi yanasıdur dostum

**10**

fâilâtün fâilâtün fâilün

- 1 Şâne urdukça sabâ çîn zülfüne  
Cân-feşân itmekdür âyîn zülfüne
- 2 Kesdi dil benden mahabbet riştesin  
Tolaşaldan berü müşkîn zülfüne
- 3 Gönlüm aldı kasd-ı î mân itmesün  
Bi'llâh iy cân hiy di bî-dîn zülfüne
- 4 Zerre-veş ser-geşteyem olalıdan  
Mâh pister mihr bâlîn zülfüne
- 5 Sünbülü gül üzre iy meh tagıdup  
Mihri tezyîn itdi tahsîn zülfüne
- 6 Cân alup dil kıymağı iy şûh u şeng  
Gözlerün mi itdi telkîn zülfüne
- 7 Benzedürse Adni sünbül destesin  
Gey hatâdur nâfe-yi Çîn zülfüne

**11**

mefâilün mefâilün feûlün

- 1 Yüzün bir nârdur âb akıdıcı  
Lebün câm-ı mey-i nâb akıdıcı
- 2 N'ola dil berresin öldürse gamzen  
Kim olur kanı kassâb akıdıcı
- 3 Yüzün gülzârıyıcun âb-ı çeşmüm  
Olupdur misl-i dûlâb akıdıcı
- 4 Hayâl-i la'l-i dür-pûşunla oldı  
Gözüm zer üzre sîm-âb akıdıcı
- 5 Dilâ gül-gonce gibi öldüriser  
Seni ol nergis-i hâb akıdıcı
- 6 Yüzün nûrı eşigün Ka'be'sine  
Olupdur şeyhile şâb akıdıcı
- 7 Dil-i Adnî hevâ nârında oldı  
Kebâb-ı germ-i hûn-âb akıdıcı

**12**

mefâilün mefâilün mefâilün mefâilün

- 1 Bana bir ilm keşf oldı senün hüsnün kitâbında  
Ki yüz bin akl âcizdür anun bir fâsl-ı bâbında
- 2 Eger nâr-ı hevân içre revân cânı kılâm teslîm

Ruhun mihriyle güller biter sinüm türâbında

- 3 Bana dünyâ vü ukbâda yiterdi izzet ü hürmet  
Eger itiyile yârun olaydum yâr bâbında
- 4 N'ola gizlense gün yüzün müselsel zülfün altında  
Ki rûşendür nihân olur kamer gice nikâbında
- 5 Aceb mi vasluna irmek hayâlin itdise Adnî  
Ki sultânlığa irişür gedâ yalancı hâbında

### 13

fâilâtün fâilâtün fâilün

- 1 İtdügümçe ruhların şevkiyle âh  
Odlara yanar felekde mihr ü mâh
- 2 Öliceğ iy meh hatun sevdâsıla  
Sinüm üzre bitiser mihr-i giyâh
- 3 Gün yüzünden çün-ki yüz döndürdi zülf  
Bu kamer devrinde oldu rû siyâh
- 4 Gün diyeydüm sana iy meh-rû eger  
Gün geyüp câme urınsaydı külâh
- 5 Neydügüm bezm-i belâda bilmedün  
İtmeyinçe süzıla efgân u âh
- 6 Kehrübâ bigi rakîbi dek buyur  
Kapayın germiyyetile misl-i kâh
- 7 Adnî'yi yad itdün iy hûr-ı behişt  
Seni sevdügüm mi olmışdur günâh

### 14

fâilâtün fâilâtün fâilün

- 1 Zülfünü çün-kim perîşân eyledün  
Âh kim kasd-ı dil ü cân eyledün
- 2 Tâze dutmaga yüzün gülzârını  
Yaşumı bârân-ı nîsân eyledün
- 3 İns ü cin râm olmagıçun hükmüne  
La'lüni mühr-i Süleymân eyledün
- 4 Subh-dem gün gibi yüzün gösterüp  
Gülleri gülşende hayrân eyledün
- 5 Agzına öykündi diyü iy sabâ  
Gonceye yok yire bühtân eyledün
- 6 Âh kim cân hâneyiken derdüne  
Anı-da dil bigi vîrân eyledün
- 7 Dest-i cevriye belâ bezminde âh  
Adnî'yi ney bigi nâlân eyledün

## 15

mef'ûlû mefâilû mefâilû feûlûn

- 1 N'idem ki hayâl-i nemek-i şekker-i nâbun  
Göstermez olupdur gözüme yüzini hâbun
- 2 Yok yire soraram lebüne varduğunu dil  
Çün-kim bilürem kanda durur meyli zübâbun
- 3 Yaşuma nazar eylemedün meyl kılup âh  
Yok kıymeti katunda meger sîm-i müzâbun
- 4 Şeb-reng saçun gün yüzüne çün ola hâyil  
Örter sanuram ebr yüzini meh-i tâbun
- 5 Öldükde gam-ı ışkunla Adni dirisen  
Lebbeyk diyem sinden işitdükde hitâbun

## 16

fâilâtûn fâilâtûn fâilâtûn fâilûn

- 1 Kankı dil tahtında kim ışkun senün sultân degül  
Bende-yi bî-derddür kim lâyk-ı dermân degül
- 2 Zülfünün zencîrinün sevdâsıyla âh kim  
Dil dahı dîvâne olmuşdur yalunuz cân degül
- 3 Serv-kaddün ayagina merdüm-i çeşmüm müdâm  
Göz yaşın cûy eylemezse râstı insân degül
- 4 İki âlem içre ma'mûr olmasun olsun harâb  
Ol gönül kim derd-i ışkunla senün vîrân degül
- 5 Adniyâ şîrîn lebin algıl dehânuna müdâm  
Gerçi cânın agzına almak kişi âsân degül

## 17

mefâilûn feilâtûn mefâilûn feilûn

- 1 Kaçan ki gün gibi ol serv-i sîm-ber görünür  
Sanavber üzre çıkup sanasın kamer görünür
- 2 Didüm mu'abbire zülfini düşde gördüğümü  
Didi yakında sana bir uzun sefer görünür
- 3 Miyânı râzına heyhât irişmedüm kılca  
Ne denlü dikkat idem nesne yok kemer görünür
- 4 Münecim uşbu gözi kaşı gün yüzünde görüp  
Bu ay başında didi halka fitneler görünür
- 5 Ne yüzden itdi gözün sihri zülfüne ta'lîm  
Ki cânlar almağışun mâr-ı heft-ser görünür
- 6 Rakîb özini görüp yârıla arama girer  
Bu hayra irmeyesinün gözine şer görünür



- 7 Göyünderdile pervâne-veş dil-i Adnî  
Egerçi şem' bigi zâhiren güler görünür

**18**

mefâîlün mefâîlün feûlün

- 1 Cemâlün ta'n ider mihr-i münîre  
Ruhun katındadır meh-tâb tîre
- 2 Tapun yad ideliden beni saldum  
Hevân odıyla yüz suyunı yire
- 3 Lebinden bûse itdüm şey' li'llâh  
Didi yok hiç nesnem Tanrı vire
- 4 Degül çün-kim beden burc iy dil-i seng  
Niçe döysün gözün atduğı tîre
- 5 Yaşum bigi ideyin cüst ü cûyî  
Ola k'ol serv-kâmet ele gire
- 6 Tolaşdı serv-kaddine gönül gör  
Ne hoş âzâdelık irdi esîre
- 7 Hevâ-yı mihrile Adnî meh ü sâl  
Olur pervâne ol şem'-i münîre

**19**

mefûlû fâîlâtü mefâîlû fâîlün

- 1 Beni musâhib olmaga komaz habîbile  
Yâ Rab ne çâre eyleyeyim ol rakîbile
- 2 Gülşende gül yüzünü güle eylemekde şerh  
Her subh hem-nefes oluram andelîbile
- 3 Zülfün hevâsına meger irişdi bâd-ı subh  
Kim hoş mu'attar eyledi âfâkı tîbile
- 4 Rahmun olayıdı eger ol zülf-i dil-keşün  
Bilsen ne müşkil işler ider ben garîbile
- 5 Gözün gibi bu cânımı bîmâr idüp durur  
Zülfeynün el bir ideli sen dil-firîbile
- 6 Olsun iki cihânda gam u derde mübtelâ  
Ol dil ki hurrem olmaya cevri habîbile
- 7 Adnî'ye çeşm-i şiveyile bir nazar kıla  
Cânı revân ider ana ol-dem dili bile

**20**

fâîlâtün fâîlâtün fâîlâtün fâîlün

- 1 Gönlümi dîvâne itdi zülf-i pür-sevdâ-yı dost  
Cânımı pervâne kıldı şem'-i bezm'-ârâ-yı dost
- 2 Yollar üstüne düşüp her dem budur hâk olduğum

Ola kim bir gün iriŖe yüzüm üzre pâ-y-ı dost

- 3 Servden tâbût u gülden bana itsünler kefen  
Öldüre çün Ŗevk-i rûy u hasret-i bâlâ-yı dost
- 4 Cân u dil çâh-ı zenahdânda kalurdı çekmese  
Anberîn zencîr uzadup zûlf-i müşk-âsâ-yı dost
- 5 Ber yirine ıŖk nârın virici bir servdür  
Gülsitân-ı hüsn içinde kâmet-i ra'nâ-yı dost
- 6 Kaddi gibi togruydı va'demüz lîkin sıdı  
Turre-yi tarrâr bigi ebrû-yı kej-rây-ı dost
- 7 Ayrulıgun zahmına urmazsa vuslat merhemini  
Öldüriser Adnî'yi Ŗevk-i ruh-ı zîbâ-yı dost

## 21

mefûlû fâilâtü mefâilü fâilün

- 1 Nâzûklığı güle ruh-ı zîbâsı öğredür  
Serve salınmagı kad-i bâlâsı öğredür
- 2 Bir serv-i lâle-'ârız u gül-çihredür k'anun  
Şûrîdeligi bülbüle Ŗeydâsı öğredür
- 3 Sordukça sırr-ı cânı lebinden dehen dutar  
Ol dîlbere bu Ŗîveyi lâlâsı öğredür
- 4 Dil-hastayam bu gün ki kıyâmet eserlerin  
Cevrile câna va'de-yi ferdâsı öğredür
- 5 Bahr-ı muhîte derdünile mevc urmagı  
Bu kanlu gözümün yaşı deryâsı öğredür
- 6 Câdû gözi egerçi ki üstâd-ı fitnedür  
Zülfine sihri ebrû-yı kej-râsı öğredür
- 7 Vasfıyla dür diŖünün iyâ mihr-i mâh-rû  
Pervîne nazmı Adnî'nün inŖâsı öğredür

## 22

mefûlû fâilâtü mefâilü fâilün

- 1 Gözüm görelî kâmet-i serv-i revânunı  
Me?vâ idindi cân u gönül âsitânunı
- 2 Şimşâd u lâleyi göricek yâd eylerem  
Gül yüzünile kamet-i serv-i revânunı
- 3 Mâni' olur kalem ucına târ-ı mû gelür  
Yazmak diledüğümce sıfât-ı miyânunı
- 4 İy murg-ı dil vatan kıl eşigini ol mehün  
Tâ k'idesin felekde bu gün âŖiyânunı
- 5 Şem'-i cemâline yakılır niçe kim direm  
Pervâne bigi iy dil oda salma cânunı

6 İy viren ayagı tozını iki âleme  
Fark itmedün bu bey'de sûd u ziyânunı

7 Ger suya bakmagıla bilineydi sırr-ı gayb  
Adnî bakup yüzüne bilürdi dehânunı

### 23

fâilâtün fâilâtün fâilâtün fâilün

- 1 İy gözüm gün yüzine rûşen nazar kıl dâyimâ  
Lîkin ol çeşm-i siyâhından hazer kıl dâyimâ
- 2 Yile baş koşmış müselsel zülfine tolaşmagıl  
Bu uzun sevdâdan iy gönlüm güzer kıl dâyimâ
- 3 Yüzi şem'ine yakışmak dilesen pervâne-vâr  
İy dil-i bî-çâre terk-i bâl ü per kıl dâyimâ
- 4 Gün yüzi aksin dileresen görmege iy cân gözi  
Gülşen içinde güle rûşen nazar kıl dâyimâ
- 5 İy sanem sana nasîhat müdde'î mi itdi kim  
Gönlini âşıklarun zîr ü zeber kıl dâyimâ
- 6 Çün-ki cânân ıskına sayd oldun iy dil çâre ne  
Cevrine sabr iylegil yâhûd sefer kıl dâyimâ
- 7 Adniyâ ger râhat-ı dil dilerisen dilberün  
Gamzesi okına cânunı siper kıl dâyimâ

### 24

fâilâtün fâilâtün fâilâtün /fâilün

- 1 Bezm-i gamda neydüğüm ol dem olıardur ıyân  
Kim derûndan sûz u derdile idem âh u figân
- 2 Gülşeninden yüzünün bir zerredür bâg-ı behişt  
Bu sebebdendür ki meyl ider ana iki cihân
- 3 Tâ gözüm gördi dehânunla kaşun yayını dil  
Tîr-veş elden çıkup cân bigi oldı bî-nişân
- 4 Mihri niçe benzedem yüzüne iy meh kim degül  
Serv-kadd ü lâle-hadd ü gül-ruh u gonce-dehân
- 5 Didüm âhumdan yüzün zülfünle pinhân eyleme  
Didi gice bâd esse şem'i kılurlar nihân
- 6 Tâ dilinde hâmenün câ dutdı sevdâ-yı hatun  
Zülf-i müşkînün bigi olmuş-durur anber-feşân
- 7 Cân virürken yüz sür eşiginde kim dervîş olan  
Adniyâ gitse kapudan evvel öper âsitân

### 25

mef'ûlû fâilâtü mef'âilü fâilün

- 1 Ol serv-i lâle-çihre ki gonçe-dehen durur  
Bir mâh-ı mihr-i tal'at u nesrîn-beden durur
- 2 Nergis gözi helâk ideli lâleyi ana  
Sordugı dehr dâğıla hûnîn kefen durur
- 3 Gülzâr-ı hüsn içinde boyun meyve yirine  
Virici ışk nârını bir nârven durur
- 4 Zülf-i benefşene bu gün iy mâh-ı serv-kad  
Bâlîn gülile lâle vü pister semen durur
- 5 Bir hûr-ı dil-rübâyı yine Adni sevdi kim  
Hulkı Hüseyin-i cân bigi hüsnî Hasen durur

## 26

fâilâtün fâilâtün fâilâtün fâilün

- 1 ?âhir oldukda yüzün mihrinden iy meh nûrlar  
Tagılur zülfün gibi ol dem şeb-i deycûrlar
- 2 La'l-i dür-bârun gamıyla çeşm-i giryânum bigi  
İy yüzi gül gark-ı hûndur gonçe-yi mestûrlar
- 3 La'lüne meyl itdügüm mestâne gözlerün görüp  
Mey yirine kanum içmek diler ol mahmûrlar
- 4 Cân nice ola halâs ol aradan kim zülfinün  
Bir kılında asılı yüz bin dil-i Mansûrlar
- 5 Gün yüzün devrinde zülfün ebr-i meh-pûş olalı  
Rûz u şeb çeşmüm zemîne akıdur yagmurlar
- 6 Hatt u haddinde tolaşur zülfine geh zülf ana  
Mârıla gör kim ne ceng ider gül üzre mûrlar
- 7 Sözlerün gevherlerin gûş itmek için Adniyâ  
Gülsitân-ı cennet içre cân virürler hûrlar

## 27

mef'ûlü mefâilü mefâilü feûlün

- 1 Zülfün niçe âkilleri dîvâne kılup âh  
Şimdi bana tolaşdı tevekkeltü ale'llâh
- 2 İy mihr-cebîn seni bu vechile gören dir  
Tâcıla kabâ geydi yire gökden inüp mâh
- 3 Cânâ görelî yüzünü dil vird idinüpdür  
Zülf ü ruhunun zikrini her şâm u seher-gâh
- 4 Sultân-ı dü âlem durur ol bende ki yârun  
Hem-demlige kûyında bula itiyile râh
- 5 Adnî yoluna cân u serin virdügi bu kim  
El-'abdü ve mâ-yemlikühû kâne li-mevlâh

## 28

mef'ûlû fâilâtün mef'ûlû fâilâtün

- 1 Boynuma tolaşaldan müşkîn saçun hevâsı  
Dil zülfünün olupdur cânıla mübtelâsı
- 2 Her yana mâyl olup ârâm kılmadugı  
Budur ki gözlerümün su üzredür esâsı
- 3 Zülfün ruhundan iy cân yüzün çevürdügiçün  
Rüsvây-ı halk idüpdür anı yüzi karası
- 4 İki cihânda bana izz ü şeref yiterdi  
Ger dost itlerinün olaydum âşinâsı
- 5 İy Adni gün yüzine rûşen nazarlar eyle  
K'âyîne-yi dilünün mahv ola jeng ü pası

29

mefâilün mefâilün feûlün

- 1 Gözüm yaşına rahm it sürme derden  
Ki merdüm-zâdedür düşmiş nazardan
- 2 Şol âhûdur gözün kim bir nazarda  
Dil ü cân sayd ider bin şîr-i nerden
- 3 Niçün men' itdi yârun tîr-i zahmın  
Ümîzüm bu m'ıdı benim siperden
- 4 Dil-i cânândan umma iy gönül rahm  
Ki bitmez verd-i ter hergiz hacerden
- 5 Hayâl-i la'l-i dür-puşunla çeşmüm  
Döker ya'kûtıla mercân güherden
- 6 Ben ol zühre-cebîne müşterîyem  
K'elüme suna hurşîdi kamerden
- 7 Yolında dilberün cân virmegiçün  
İyâ Adnî hazer eyle hazirden

30

mef'ûlû fâilâtü mefâilü fâilün

- 1 Ol serv-i mâh-çihre ki gülden yanagı var  
Cân u gönülde lâleleyin mühri dâğı var
- 2 Dil murgı hâli dânesi saydıdadur velî  
Bilmez anı ki zülf-i siyâhından ağı var
- 3 Bezm-i gamunda kanlu gözüm dil kebâb idüp  
Nûş itmege şarâbıla tolu kabagı var
- 4 Benzetme mihr ü mâhı felekde cemâline  
Nâ-gâh kimse işide yirün kulagı var
- 5 Zülfün ruhunla her gice şehrinde hüsnünün  
San pâsbân durur ki elinde çerâğı var

6 Bâg-ı ruhını murg-ı nazardan sakınmaga  
Zülfinden aslu serv boyı üzre zâğı var

7 Adnî gerekse derdine sabr it gerekse öl  
Cânânenün dirîg ki senden ferâğı var

### 31

mefûlû mefâilû mefâilû feûlûn

1 Dildârıçun endîşe-yi cân eylemek olmaz  
Yok nesneyiçün bunca ziyân eylemek olmaz

2 Öldürmege kavlı itdügine durmadı gerçi  
Cân virmek olur anı yalan eylemek olmaz

3 Agzun haberin sorduguma hışmıla bakma  
Her lahzada bir yok yire kan eylemek olmaz

4 Sînemde ruhun mihri kaçan gizlene çün-kim  
Hurşîdi gil içinde nihân eylemek olmaz

5 Dâg-ı gamın andukça gönül cânunı yakma  
Her andugını kişi hemân eylemek olmaz

6 Râz-ı dehenin sakladugum cân bigi bu kim  
Ser virmek olur sırrı ıyân eylemek olmaz

7 Âh eyleme Adnî dile geldükçe hayâli  
Mihmân variken evde duhân eylemek olmaz

### 32

mefûlû fâilâtü mefâilû fâilûn

1 Çün nûr-ı tal'atun sanemâ âşikâr olur  
Hurşîd ü meh zevâle düşüp şermsâr olur

2 Ejder dirilse zülfî izârında vechi var  
Kim su içinde yatmagıla mûy mâr olur

3 Hüsñün gülî arûsı bezendükçe nâzıla  
Gün şîşe-yi gül-âb u meh âyîne-dâr olur

4 Hâlûn ruhunda yandı yüz uralı zülfüne  
Lâ-büd salîbe secde kılan ehl-i nâr olur

5 Şeb-reng hattı bitmese haddinde tan degül  
Kim bâg-ı cennet içre şeb olmaz nehâr olur

6 Görüp kenâra geldügi gözüm yaşın bu kim  
Bilür makâm-ı serv leb-i cûybâr olur

7 Cân virmegile vaslına irmek murâdisa  
Olmaz tasavvur iyleme Adnî ne var olur

### 33

mefûlû fâilâtü mefâilû fâilûn

- 1 Kaddün hırâmı tûbiye hayret virüp-durur  
Haddün gül-i cinâna hacâlet virüp-durur
- 2 Meh gün yüzünle da'vi-yi hüsn itse vechi yok  
Çün hat yazup izâruna huccet virüp-durur
- 3 Güm kılsa cânı şehd lebinden diler gönül  
Şîrîn degül mi san-kim emânet virüp-durur
- 4 Dîvâne dil belâ-yı gamundan figân ider  
Bilmez ki ana Tanrı ne ni'met virüp-durur
- 5 Bir demde bin ölüye hayât-ı ebed virür  
Kevser lebüne Hak ne kerâmet virüp-durur
- 6 Gam leşkeri ziyân ide mi çün-ki ya kaşun  
Gamzen okını cânâ alâmet virüp-durur
- 7 Adnî hadeng-i gamzesin andukça cân virür  
Allâh ana ne tuhfe mahabbet virüp-durur

#### 34

fâilâtün fâilâtün fâilâtün fâilün

- 1 Cânı n'eylerdi dil-i bî-çâre cânân olmasa  
Bülbüle âlem kafesdür ger gülistân olmasa
- 2 Öldürem didüğine âhır peşmân oldu âh  
N'olayıldı hûblar bî-'ahd ü peymân olmasa
- 3 Leblerünçün çeşm ü dilde mâcerâ var korkaram  
Ol iki hûn-rîzün arasında bir kan olmasa
- 4 Gözlerüme tûtiyâ-yı hâk-i pâyun bes durur  
Ey tabîb-i cân ne gam kühl-i Sıfâhân olmasa
- 5 Hüsnünün gencînesin yagmâ kılurdu hûblar  
Ejdehâ-yı turre-yi zülfün nigejbân olmasa
- 6 Işk-ı cânânıla dil ol denlü ülfet dutdı kim  
Kâşkî cümle cihân derd olsa dermân olmasa
- 7 Ol kadar oldu gam-ı hecrünile Adnî nizâr  
Kim anı bilmezdi kimse âh u efgân olmasa

#### 35

mefâilün feilâtün mefâilün feilün

- 1 Görürse gün yüzünün tal'atın kamer yirine  
Sezerse şehd lebün vasfını şeker yirine
- 2 Kaşun kemânı ne denlü kim ata gamzen okın  
Nişân ider dil ana cânını siper yirine
- 3 Boyun ki serv-i gülsitân-ı hüsndür ne aceb  
Ki virdügi bana nâr-ı gam oldu ber yirine
- 4 Cefâsı hânını bahş itdüğini gayrılara

İřitse derdile dil yakılup ciger yirine

- 5 Harâmî gözlerüne kanımı helâl ideyin  
Cefâ vü cevrunı dök lutf iyle vir yirine
- 6 İrerse boyuna serv-i sehî ola mâyl  
Görürse lâle yanagını verd-i ter yirine
- 7 Ayagunun tozu girseydi Adni'nün eline  
Çekerdi gözlerine sürme-yi basar yirine

36

mefâilün feilâtün mefâilün feilün

- 1 Hayâl-i la'l-i güher-bârunıla dem olmaz  
Ki cân-ı bülbül-i dil gonce bigi dem olmaz
- 2 Lebün zülâli meger şerbet-i cinândur kim  
Ne denlü nûş iderem hiç nesne kem olmaz
- 3 Günüm sana nicesi ayı benzedem kim ol  
Çenâr-kâmet ü gül-rûy u gonce-fem olmaz
- 4 Yüzünle gözlerüne eylesün nazar şol kim  
Diyâr-ı Rûm'da dir âhu-yı harem olmaz
- 5 Tabîb derd-i dile itme şerbetile ilâc  
Lebinden özge ana hiç nesne em olmaz
- 6 Kapunda hâr u hakîr olmayan itün gibi  
Cihânda izzet ü bahtıla muhterem olmaz
- 7 Aceb nedür sana kûyında cevritdüğü çün  
Behişt içinde bilür Adniyâ sitem olmaz

37

feilâtün feilâtün feilâtün feilün

- 1 Tîg-ı derdile dilersin dilümi hâme miyem  
Dest-i cevriye bükersin belümi nâme miyem
- 2 Ko beni zâr olayın zülfün ucında niçe bir  
Başumun kat'ına el uzadasın hâme miyem
- 3 Kâz-ı hasretle tenüm togradı hayyât-ı firâk  
Yâ Rab endâmına cevrit felegün câme miyem
- 4 Bilmezem aklımı sevdâ alalı kim meftûn  
Bu lebi pisteye yâ ol gözi bâdâme miyem
- 5 Müşke benzetdügüme zülfini pür-çîn oluban  
Didi uzatma dilün bana nedür şâme miyem
- 6 Meclis-i hâssı rakîbâ koyuban âma varam  
Hâşe ben sencileyin âlet-i hengâme miyem
- 7 Adniyâ kimse beni bilmedi mihriyle esîr  
Serv-i âzâde mi yâ mâh-ı gül-endâme miyem



38

mefûlû fâilâtü mefâilü fâilün

- 1 Mâh öykünürse gün yüzüne hiç edeb degül  
Gün niçe benzesün sana kim gonçe-leb degül
- 2 Şîrîn lebüne öykünürimiş meger şeker  
Çün kelledür utanmamak andan aceb degül
- 3 Su üzre ugradukça gelüp mâhı ditreden  
Gün yüzünün hayâlî durur tâb-ı teb degül
- 4 Yâ yâra irürem virürem yâ gamıla cân  
Gözüm segürdüğü bilürem bî-sebeb degül
- 5 Olmaz bu hüsn ü hulk u letâfetle iy perî  
Ol kimse k'ana mihr ana vü mâh eb degül
- 6 Başdan ayaga rûh-ı mücessem durur tenün  
Kim dir vücûd-ı pâküne kim lutf-ı Rab degül
- 7 Ey hûr Adni'nün sımagıl gönli şişesin  
Kim Edrine diyârı durur bu Haleb degül

39

fâilâtün fâilâtün fâilâtün fâilün

- 1 Boynuma zülfün salaldan halka-yı zencîrini  
Âh kim unutdı akl u cân u dil tedbîrini
- 2 Leblerün cânlar bağışlar tıflıken dâyen meger  
Emzürürken âb-ı hayvâna karardı şîrîni
- 3 Kana bulaşsun bu mıydı ben siperden umdugum  
Kim dil ü cândan ideydi men' yârun tîrini
- 4 Gamzesin tîz eylerimiş cânım almaga gözün  
Hak muvâfık eylesün tedbîrine takdîrini
- 5 Merdüm-i çeşmüm yakup cân micmerinde ûd-ı  
Eylemek diler hayâlünle perî teshîrini
- 6 Zülfüne yüz virme kim başa çıkar Hindû durur  
Hâl-i hod-bînün bigi ol-dahı bilmez yirini
- 7 Öldürelden yâr eşiginde rakîb-i kâfîri  
Asdılar arş ayagında Adni'nün şemşîrini

40

mefûlû mefâilü mefâilü feûlün

- 1 Tâ la'l-lebün aksi dil-i sâgara düşdi  
Uşşâk-ı cihân cümle mey-i ahmere düşdi
- 2 Cân virdüğü dil gamzenün öninde budur kim  
Hecr odına sabr idemeyüp hançere düşdi

- 3 Meh yüzünile kıldugıçun hüsnde da'vî  
Mihrün kızarup yüzi hayâdan yire düşdi
- 4 Vardı müjeden zülfine cân-bâz oluban dil  
Gör nice kılıçdan atılup çenbere düşdi
- 5 Uşşâkına lutfi ni'amın kısmet iderken  
El-minnetü li'llâh gamı ben çäkere düşdi
- 6 Gülşende görüp kadd ü ruhun reşk ü hayâdan  
Güller kızarup lerze ten-i ar'ara düşdi
- 7 Adnî bigi sa'd-ahter ü ferhunde-zamândur  
Şol dil ki bu gün sen yüzi meh dilbere düşdi

#### 41

mefûlü fâilâtü mefâilü fâilün

- 1 Yârun ayagı tozına kıymet cihân gerek  
Belki cihân ne nesne ola baş u cân gerek
- 2 Bir yârı kılmişam iki âlemde ihtiyâr  
Evvel kişiye cân gerek andan cihân gerek
- 3 Vardukça dil eşigine cân pîş-keş kılur  
Yârı evine varsa kişi armagan gerek
- 4 Kanlu yaşum yiterdi yine sevgüsiyiçün  
Da'viye ma'nî vü dahı ıška nişân gerek
- 5 La'lini dişledükçe gözi kanumı döker  
Elbette hükm-i şer' budur kana kan gerek
- 6 Yüzüne karşı göz yaşın akıtdugum bu kim  
Gülzârı tâze dutmaga âb-ı revân gerek
- 7 Cûşıla agladugını ayb itme Adni'nün  
Âşık olanların gözi deryâ-feşân gerek

#### 42

feilâtün feilâtün feilâtün feilün

- 1 Ol ham-ı zülf-i siyeh kim ruh-ı cânânda yatur  
Mârdur halka olup sahn-ı gülistânda yatur
- 2 Bir nazar kıldı meger gayra gözüm merdümü kim  
Gamzesi yaraladı gark oluban kanda yatur
- 3 Zülfi sevdâsıyla dil enegi çâhında  
San-ki divâne durur bendile zindânda yatur
- 4 Neyiçün kaçâ gönül şehr-i şeh-i şâdiden  
Ki konup leşker-i gam nâhiye-yi cânda yatur
- 5 Aglasam hasta yatup gün yüzine karşı ne tan  
Depreşür nezlesi ol-kim meh-i tâbânda yatur
- 6 Nite hâlî ola Ya'kûb-ı dil aglamakdan

Ki dahı Yûsuf-ı cân çâh-ı zenahdânda yatur

- 7 Zülfî çevgânına gûy ola diyü Adni bigi  
Niçeler top idüben başını meydânda yatur

43

mefûlû fâilâtü mefâilü fâilün

- 1 Dil murgın ol-ki dâm-ı belâya nihân salar  
Cân hırmenine âteş-i ışkı ıyân salar
- 2 Göyüندی mihr-i tâbına dil ol mehün aceb  
Başuma serv-kâmeti sâye kaçan salar
- 3 Yâ Rab gözüm yaşı bigi ben bî-sitâreyi  
Niçün nazardan ol meh-i nâ-mihribân salar
- 4 Rahmet nesîm-i kûyına kim tozı kühlini  
Her dem ilâciçün gözüme râyegân salar
- 5 Ser-sebz ola diyü boyunun servinün gözüm  
Her lahza pâyına suyıçun bâgbân salar
- 6 Öykündügince boyuna gülşende nârven  
Hışm idüp ana başını serv-i revân salar
- 7 Işkın havâle kılduğı ol hûr Adniye  
Sayyâddur ki murg-ı zebûna togan salar

44

mefâilün mefâilün mefâilün mefâilün

- 1 Güler yüzüne anlar kim gül-i bâg-ı cinân dirler  
Gözüm yaşına cûy u kaddüne serv-i revân dirler
- 2 Gözümle gönlümün çok mâcerâsı vardır evvelden  
Lebünçün âh kim şimdi arada oldu kan dirler
- 3 Etıbbâdan su?âl itdükçe ıskun derdine dermân  
Cevâbında ciger kanını içüp yörü yan dirler
- 4 Dilâ hûn-ı cigerden zâd idin zülfî ise azmün  
Ki gâyet müşkil uzundur reh-i Hindûstân dirler
- 5 Nazar kıldukça yüzün ayına rûşen olur çeşmüm  
Eğerçi kim güne bakmak göze eyler ziyân dirler
- 6 Gönül iki cihânun varlığın bir yârıçun vir kim  
Kişi olana evvel cân gerek andan cihân dirler
- 7 Görenler Adni'yi dil-hasta eşigünde yaturken  
Sana yaşlar gam-ı ışkunla virür şimdi cân dirler

45

feilâtün feilâtün feilâtün feilün

- 1 Ol hat-ı gâliye-sâ kim ruh-ı cânânda biter  
Çemen-i bâg-ı İrem'dür ki gülistânda biter

- 2 Yolına öldüğüme minneti yok dilberümün  
Tıfıldur iyle sanur cânı ki bostânda biter
- 3 Düşdügi yirde boyun sâyesi iy gülbün-i nâz  
Nârven zâhir olur serv-i hırâmân-da biter
- 4 Salsa çâh-ı zekana dil lebin ısırdığıçun  
Gam degül kim nice kan işleri zindânda biter
- 5 Leb-i cân-perver-i dildârda hatt-ı siyehi  
Sebze-yi Hızr durur çeşme-yi hayvânda biter
- 6 Ne aceb olmasa sînemde hayâli ruhunun  
Gül-i hod-rûy kaçan âteş-i sûzânda biter
- 7 Adni itdükçe miyânına nazar dikkatile  
Mûy men' itmegiçün dîde-yi giryânda biter

46

mefûlû fâilâtü mefâilû fâilün

- 1 Ol dil ki cevri-i yârıla zevk u safâ sürer  
Çok yaşasun ki devrini hoş mûntehâ sürer
- 2 Mât itdi mâh-ı çâr-dehi mihriyle ruhu  
Gerçi henüz on ikisin ol dil-rübâ sürer
- 3 Âhum yüzinden açmadı zülfi hicâbın âh  
Günden sehâbı gerçi ki dirler hevâ sürer
- 4 Dil oldı müşterî yine bir mâh-rûya kim  
Her dem yüzün ayagına şems ü zuhâ sürer
- 5 Anber saçuna öyküneli müşki gezdürüp  
Bâzâr içinde yüzine âlem kara sürer
- 6 Sultân-ı dehr olan kuru gavgâ çeker hemîn  
Âlem içinde ömr safâsın gedâ sürer
- 7 Adnî melûl olma ki agyârı it bigi  
Bir gün yanından ol sanem-i meh-likâ sürer

47

fâilâtün fâilâtün fâilâtün fâilün

- 1 Hecrile öğrendi gönlüm vasl-ı cânândan kaçır  
Derdinün zevkin bilen elbette dermândan kaçır
- 2 Tîr-i gamzen zahmına dilden nice cân vermeyem  
Kimse mi vardur cihânda lutf u ihsândan kaçır
- 3 Öldüriser yaşuna rahm eyleyüp cânân seni  
Çün cevândur iy gönül gam yime kim kandan kaçır
- 4 Gün yüzünle meh mukâbil olmayup gizlendiği  
Bu ki maglûb olsa hasm elbette meydândan kaçır

- 5 Ger nihân ola hayâlün merdüminden çeşmümün  
Tan degül çün-kim perî vahşîdür insândan kaçır
- 6 Zülfi hattıyla ne yüzden oldı yâ Rab hem-nişîn  
Resmdür hod akrebün dirler ki reyhândan kaçır
- 7 Dilberün yolında Adnî öldüğü her dem budur  
Cân dirîg ider diyeler diyü bühtândan kaçır

48

fâilâtün fâilâtün fâilâtün fâilün

- 1 Çün sanavber kâmetün yâdına dil sahbâ çeker  
Serv-i şâdî gülşen-i cânda bitüp bâlâ çeker
- 2 Bâgbân-ı hüsn yüzi gülşenin suvarmaga  
Zülfi zencîriyle câh-ı zenahdan mâ çeker
- 3 Hasta gönlüm ol mehün bir gün göreliden yüzini  
Yıllar olmışdur ki dahı illet-i sevdâ çeker
- 4 Hüsn milkini musahhar kılmagıçun hükmile  
Hûblık menşûrına reyhân hatı tugra çeker
- 5 Eşiginden zülfini ol meh yukaru çekdüğü  
San melekdür kim zemînden göge ejderhâ çeker
- 6 Âlemün zevk u safâsını gedâ sürer hemîn  
Pâdişâh-ı dehr olan ancak kuru gavgâ çeker
- 7 Yine bir mihr-i kamer-ruhsârı Adnî sevdi kim  
Hâk-i pâyin sürme diyü gözine havrâ çeker

49

fâilâtün fâilâtün fâilâtün fâilün

- 1 Bâg-ı hüsn içre boyun teg serv-i dil-cû bitmeye  
Gülşen-i cânda ruhun-veş verd-i hoş-bû bitmeye
- 2 Âteşin sînemde olduğu hayâli zülfinün  
Tuhfedür od yakdugı yirde gerek mû bitmeye
- 3 Göz yaşından gönlümün zahmın sakındugum budur  
Kim genezlikle cerâhat çün kapa su bitmeye
- 4 Didüm öldür râzıyam dek lutfile bir bûse vir  
Hışm idüp didi ki kan işi bite bu bitmeye
- 5 Öykünürmiş zülf-i anber-bâruna utanmadın  
Göreyin kim onmaya müşk-i siyeh-rû bitmeye
- 6 Gülsitân-ı hüsn içinde kâmet-i cânân bigi  
Tâ kıyâmet râstı bir serv-i dil-cû bitmeye
- 7 Adniyâ ol hûr-ı meh-rûnun eger kaddın göre  
Hacletinden togru bil tûbâ-yı mînû bitmeye

50

fâilâtün fâilâtün fâilâtün fâilün

- 1 Gönlümi tâ mihri le ol mâh-ı gonce-fem kapar  
Bâz-ı ışkî sayd idüp cân murgını her dem kapar
- 2 Dil yüzün günileyüp zülfünden aglar rûz u şeb  
Ne hayâl-engîzdür gör kim bulıtdan nem kapar
- 3 Gamzesinden tan degül hûn-rîzlik öğrendügi  
Her ne san'at kim göre kâbil-durur âdem kapar
- 4 İhtiyât idüp yaşumdan tîg urur dil zahmına  
Suyı ya'nî urmayınca yaraya merhem kapar
- 5 Akl u cân u dil kapup gözün yine komaz beni  
Çün-ki nesnem kalmadı pes dahı cânâ nem kapar
- 6 Cânıla dil itünün izi tozın kapsa ne tan  
Resmdür çün-kim gedâ yirde göre dirhem kapar
- 7 Nice mahzûn olmasun Adnî şeb-i hecründe kim  
Şâdlık tâcın başından her dem anun gam kapar

**51**

feilâtün feilâtün feilâtün feilün

- 1 Dili zülfünde bulan bendile dîvâne sanur  
Cânı yüzünle gören şem'ile pervâne sanur
- 2 Dilde habs itdügüme gamzesi tîgın gücenür  
Câna zahm urducagı hoşca mıdur ya ne sanur
- 3 Zülfî agına gönül murgı dutulsa ne aceb  
Çün görüp hâl-i siyâhını anun dâne sanur
- 4 Işk-ı cânânıla ma'mûre-yi âlemdür dil  
Gerçi bî-derd olanlar anı vîrâne sanur
- 5 Doğalı mihnet ü derdile ulaldugıyçun  
Kendüye derd ü gamı dil ata vü ana sanur
- 6 Cân virür üstine gam bâdiyesinde su sanup  
Âb-ı tîgunla meger teşne gönül kana sanur
- 7 Dil-i sevdâ-zede-yi Adnî'yi zülfünde gören  
Bend ü zencîre çekilmiş anı dîvâne sanur

**52**

fâilâtün fâilâtün fâilâtün fâilün

- 1 Lutfile çün hânesinden gün gibi cânân çıkar  
Matla'ından sanasın dogup meh-i tâbân çıkar
- 2 Kanda kim şekker-lebün yâd eyleyüp yaşlar dökem  
Cûş idüp ol yirden âb-ı çeşme-yi hayvân çıkar
- 3 Cân gözün tîrine istikbâl kıldugı bu kim  
Resmdür karşı kişi çün-kim gele mihmân çıkar

- 4 Cân dirîg ider dirimiş sana benümçün rakîb  
İmtihân eyle görelüm kankımız yalan çıkar
- 5 Hatt bitdükçe kebâb idüp ciger arz itdügüm  
Sebze vaktinde bu kim âdet-durur biryân çıkar
- 6 Çeşmüme gamzen hayâli gelse kan agladugum  
Tan degül zirâ kim ok irdügi yirden kan çıkar
- 7 Ol-kadar urdun ezelde Adnî'ye gamzen okın  
Hâk-i kabrinden arasan tâ ebed peykân çıkar

### 53

mefâilün mefâilün mefâilün mefâilün

- 1 Şeb-i zülfinde ol meh yüzini çün-kim nihân eyler  
Per-i tâvûsdan hurşîde san-kim sâye-bân eyler
- 2 Lebine kasd iderken dil gözi gamzeyle öldürdi  
Meseldür bu ki kişi az tama'dan çok ziyân eyler
- 3 Kaşı yayına kurbân olayın ol türk-i hûn-rîzûn  
Ki tîr-i gamzesine cânımı her dem nişân eyler
- 4 Ne cellâd-ı siyeh-dildür gözün bir lahzada cânâ  
Ki yüz bin hûn-ı nâ-hakk itdi kanmaz dahı kan eyler
- 5 Lebine meyl idüp hâline karşı âh kıldugum  
Bu kim zenbûrdan şehd alayım diyin duhân eyler
- 6 Bu akl-ı hurde-bîn keşf idemez hiç agzunun sırrın  
Yakîn budur ki yok yire hemîn vehm ü gümân eyler
- 7 Kaçan-kim lâle haddün şevkiyle aghlasa Adnî  
Gözinün kanlu yaşı çevresini gülsitân eyler

### 54

mefûlü fâilâtü mefâilü fâilün

- 1 Ol serv-i gül-'izâr ki gonce dehânı var  
Bir gün mukâbil olmaga ayun ne cânı var
- 2 Gönlüm ki cân virüp gamıla aldı derdini  
Çok assı itdi sanmanuz anun ziyânı var
- 3 Kasd itdügiyiçün leb-i cân-bahşına gönül  
Ger öldürürse gözleri kim dir ki kanı var
- 4 Çün gönlüm aldun itme dahı kasd-ı cân u ser  
İnen-de hadden aşma her işün oranı var
- 5 Geh cân emîr olur gamı milkine gâh dil  
Lâ-büd cihânda her kişinün bir zamânı var
- 6 Gördükçe hışm idüp acı sözler virür bana  
Kurbân olayın ana ne şîrîn zebânı var

- 7 Vardukça Adni dilbere cân tuhfe iledür  
Niç'itsün eli boş varamaz adı sanı var

55

fâilâtün fâilâtün fâilâtün fâilün

- 1 Tarasa zülfin gönüller yire çün bârân yagar  
Söylese şîrîn lebinden söz yirine cân yagar
- 2 Agladugum zülfini yüzine saldukça bu kim  
Ay başında çün bulıtlı ola gün bârân yagar
- 3 Lâle-haddün gibi gülsem iy kemân-ebrû ne tan  
Tîr-i gamzenden dile bârân-sıfat peykân yagar
- 4 Câm-ı mey sun sâkiyâ itme günehten ihtirâz  
Devr-i güldür yire gökden rahmet-i Rahmân yagar
- 5 Gördüğince yâr yanında rakîbi Adni'nün  
Kakıdugından dilinden âteş-i sûzân yagar

56

mefâilün mefâilün mefâilün mefâilün

- 1 Unutdıysa n'ola dilber bizi lutf u vefâsından  
Bi-hamdi'llâh ki her dem yâd ider cevri ü cefâsından
- 2 Siyeh-pûş oldugum âhum bigi her dem bu kim başum  
Kızıl kanlara boyandı gözümün mâcerâsından
- 3 Habîbümçün rakîbün nîşini nûş itdügüm her dem  
Bu kim bal isteyen kişi hazer kılmaz belâsından
- 4 Benümçün dirlerimiş yârı terk itdi ne çârem var  
Halâs olmaz cihânda kimse halkun iftirâsından
- 5 Dil-i bîmâra lutf eyle gamundan em buyur cânâ  
Ki derdün ana yigrekdür etıbbânun devâsından
- 6 Benefşe zülfüne öykündügiyçün hâkimi dehrün  
Dilin bâzâr içinde gezdürüp çekdi kafasından
- 7 İnen-de Adni-yi dil-hastayı cevri ü öldürme  
Begüm dervîş olanların hazer eyle du'âsından

57

mefâilün feilâtün mefâilün feilün

- 1 Şerefde gün yüzüne mâh-ı âsmân iremez  
Revişde kâmetüne serv-i bostân iremez
- 2 Cigerde gamzesi zahmın gönül ganîmet bil  
Bu devlete niçeler virdi baş u cân iremez
- 3 Dehânı sırrını fikrile niçe keşf ide dil  
Yakîn budur ki ana vehmile gümân iremez
- 4 Yanagı zülfi ucından görünmese ne aceb



Ki nâra nûr-ı basar çün ola duhân iremez

- 5 Diledüm eldeyiken zevkile geçer ömrün  
Mesel-durur ki zamân devrine zamân iremez
- 6 Ruhuna öyküneli meh yüzine noksânın  
Tolaşur urmagıçun mihr-i âsmân iremez
- 7 Yüzünle yaşunı sîm ü zer eyle iy Adnî  
Ki yâr dâmenine dest-i müflisân iremez

## 58

mefâilün feilâtün mefâilün feilün

- 1 Zamân-mı var ki gamundan cigerde rîş olmaz  
Şükür tena"umısa ancak ola bîş olmaz
- 2 Lebün hayâli dile gelse zahm urur gamzen  
Cihânda nûş mı vardur kim anda niş olmaz
- 3 Ezelde derd ü gamundan ne dil ki yad oldu  
Safâ vü şâdiyle tâ ebed biliş olmaz
- 4 Dil aldı gussasını câna hisse virmedi âh  
Mesel-durur ki adûçun adû-yı hîş olmaz
- 5 Yanagıdur lebi unnâbın eyleyen rengîn  
Belî harâret-i mihr olmasa yimiş olmaz
- 6 Niçe bir ola mu'âriz benümle n'olsa gerek  
Rakîbi öldüriserven ki bitmez iş olmaz
- 7 Kaşı kemânına cân u gönülden ol kurbân  
Ki Adni buncılayın âlem içre kiş olmaz

## 59

mefûlü fâilâtü mefâilü fâilün

- 1 Ney gibi niçe bir gam elinden figân idem  
Hoşdur ki yüz suyuyla teslîm-i cân idem
- 2 İrem mi ol güne ki kaşı yayına gönül  
Kurbân idüp gözi okına cân nişân idem
- 3 Gamzen helâk idüp dil ü cân geldi sîneme  
Kanlularından anı diler kim nihân idem
- 4 Zülf ü ruhun hayâliyle rûz u şeb gerek  
Virdüm dilümde sûre-yi Nûr u Duhân idem
- 5 Yüzünle kâmetün varıken vech olmaya  
Yâd-ı sanavber ü heves-i gülsitân idem
- 6 Yaşum bigi arama girer yârıla rakîb  
Şeytân aradadur anı ister ki kan idem
- 7 Dirmiş yolumda cânını Adnî dirîğ ider  
Ölem komayam anı ben âhır yalan idem

60

mefâilün mefâilün feûlün

- 1 Yüzün dil bûlbûlinün gülsitânı  
Boyun cân bâğının serv-i revânı
- 2 Güni iy meh yüzüne benzedeydüm  
Eger şekkerden olaydı dehânı
- 3 Gam-ı dilberle cân virmek cihânda  
Hemîn ola hayât-ı câvidânî
- 4 Dehânı râzını keşf itmedi hîç  
Lebinden niçe kim sordum nihânî
- 5 Yüzüne öykünelden lâleyi dehr  
Oda yakdı düter dahı duhânı
- 6 İnanma zülfi peymânına iy dil  
Kim anun bir başı var bin zebânı
- 7 Kaşunla kirpügüne öykünürmiş  
Kazâya göreyin tîr ü kemânı
- 8 Yüzünü görmedin Adnî ölürse  
Senün boynunadur iy dost kanı

61

feilâtün feilâtün feilâtün feilün

- 1 Gam-ı cânâne gönül tahtına kim hân dikilür  
Bendeyiken dü cihân milkinge sultân dikilür
- 2 Gezleyüp gamze okın atsa kaşı yayından  
Dilden ön ana nişân olmagıçun cân dikilür
- 3 Kâmet ü zülf ü ruhun her yire kim sâye sala  
Sünbül ü lâle biter serv-i hırâmân dikilür
- 4 Dilberi gözledüğüm kasrına vardukça bu kim  
Cânı çıkdukda göge dîde-yi insân dikilür
- 5 Gözde olmasa hat u haddi hayâli ne aceb  
Âb-ı deryâda kaçan lâle vü reyhân dikilür
- 6 Kâmetün görmegiçün gülşene vardukça durup  
Bir ayag üstine bin serv-i hırâmân dikilür
- 7 Gerçi müşkil görünür gamzesi zahmı Adnî  
Rişte-yi zülfîyle gam yime âsân dikilür

62

feilâtün feilâtün feilâtün feilün

- 1 Lâlenün benzemege gül yüzüne çihresi yok  
Goncenün anmaga la'lîn lebünü zehresi yok

- 2 Mâh hurşîde uyup gün yüzüne öyküneli  
Şermden halka nazar eylemege çihresi yok
- 3 Zahm-ı gamzenle ne dil kim boyuna virmedi cân  
Râstı sehm-i sa'âdetden anun behresi yok
- 4 Nite sa'd-ahter ola ol kişi kim yanında  
Büt-i meh-tal'at ü hurşîd-cebîn Zühre'si yok
- 5 Adniyâ zülfine dîvânelenüp tolaşma  
Ejdehâdur kim anun zehri çog u mühresi yok

### 63

mef'ûlü mefâilü mefâilü feûlün

- 1 Şükrâne gerek terk-i ser ü cân u ten itmek  
Ger mümkün ola kûyını bir dem vatan itmek
- 2 Kan itdügüme hançerini dilde gücenmiş  
Ya hoşça m'ıdı kasd-ı ser ü cân u ten itmek
- 3 Tığına libâs eyledüğüm hûn-ı cigerden  
Uryâna bu kim hayr durur pîrehen itmek
- 4 Gülşende boyun servine öykündüğünü gör  
Düşer m'idi andan bu işi nârven itmek
- 5 Yüzünle yanagun varıken bâg-ı cinânda  
Bî-vech durur yâd-ı gül ü yâsemen itmek
- 6 Cân virmegile yoluna gönlün hoş olursa  
Sen şehden anı demek ü ben bendeden itmek
- 7 Yüz buldunısa itine hem-ser dirilürsin  
Haddün mi durur işbu işi Adni sen itmek

### 64

fâilâtün fâilâtün fâilâtün fâilün

- 1 Her seher dilden bu remzi bülbül-i gûyâ geçer  
Câm-ı mey nûş eyle kim devr-i gül-i hamrâ geçer
- 2 İtdüginçe yüzün ayına nazar gönlüm bigi  
Kendüden bî-hûş olup mihr-i cihân-ârâ geçer
- 3 Kırpüğüm üstinde yaşum sâhil-i çeşmümde san  
Merdüm-i mellâhdur kim sal idüp deryâ geçer
- 4 Öykünelden gün yüzine hacletinden her gice  
Şehr-i cânândan kamer uğrı bigi tenhâ geçer
- 5 Yüzi tâbından-durur bîmâr oldugı gözi  
Lâ-cerem çok yatsa günde merdüme germâ geçer
- 6 Gamzen okın câna urdun iyle mi kanı dile  
Sizünile biz kaluruz bu dahı câna geçer
- 7 Nazm u nesre Adniyâ meşgûl olursan n'ola kim

Ehl-i irfân devridür eş'ârıla inşâ geçer

65

fâilâtün fâilâtün fâilâtün fâilün

- 1 Kanda kim yüz nâzıla bir dil-rübâ cânân kopar  
Çevre yanında hezârân nâle vü efgân kopar
- 2 Yâd idüp âh itdügümçe zülf-i anber-bârını  
Dûd-ı âhumdan hevâda ebr-i müşk-efşân kopar
- 3 Milk-i dil sahrâlarında derdünile âh kim  
Leşker-i gam ayagından gerd-i bî-pâyân kopar
- 4 Zülfünün gelse hayâli çeşmüme âh eylerem  
Lâ-cerem deryâ kararur ilk bâd andan kopar
- 5 Ka'be-yi kûyunda âh itdükçe yaşlar dökdüğüm  
Tan degül bâd esdüginçe kıbleden bârân kopar
- 6 Zülf-i kâfir-kîşi sevdâsıyla cân virmeyen  
Rûz-ı mahşerde yüzi kara vü bî-îmân kopar
- 7 Gülşeninde yüzünün yaşun bitürdi hattını  
Adniyâ bârân çoğ olsa sebze-yi bostân kopar

66

feilâtün mefâilün feilün

- 1 Dil yanar bî-nigâr olduğın  
N'ola fasl-ı bahâr olduğın
- 2 Binden artuk durur vefâsın uman  
N'eylesün bir nigâr olduğın
- 3 Serv-i âzâdunun esîri durur  
Ne var adı çenâr olduğın
- 4 Dil-i gamgîn hemîşe hurremdür  
Hem-dem-i derd-i yâr olduğın
- 5 Gönderür milk-i câna gam çerisin  
Saklar anı kenâr olduğın
- 6 Anberîn zülfine kaçan benzer  
N'ola müşk-i Tatar olduğın
- 7 Gam yimez Adni kavlı-i a'dâdan  
Çerh-ı acmâ cübâr olduğın

67

mef'ûlû mefâilü mefâilü feülün

- 1 Şerh itse gönül sûzıla hâl-i cigerinden  
Odlara yanar iki cihân bir haberinden
- 2 N'idem yaşumun âhıla dek durmadugından  
Güç görmek acıymış kîşi perverdelerinden

- 3 Tenhâ koyup ol meh beni nâzıla gönelse  
Yılduz saçılır her yana çeşmüm güherinden
- 4 Bir yire kadem bassa ne îsâ-dem olur kim  
Bin mürde olup zinde durur reh-güzerinden
- 5 Şîrîn sözidür agzı vücûdına olan dâl  
Lâ-büd bilinür zât-ı mü'essir eserinden
- 6 Görmezdi kûsûfun sebeli zahmetini gün  
Ger zerrece girse gözine hâk-i derinden
- 7 Gözüm yaşın elden koma güher gereğise  
Bahreyni gezüp şimdi gelüpdür seferinden
- 8 İhyâ-yı mevât itse ne tan çeşme-yi hayvân  
Çün itdi Hudâ mâyesin agzun şekerinden
- 9 Görmek dilesen mürde dirildüğünü yârâ  
Tîr eyle revân Adnî'ye gamzen seherinden

#### 68

mefâilün feilâtün mefâilün feilün

- 1 Götür nikâbı yüzün nûrın âşikâr eyle  
Zevâle sal güneşi mâhı şermsâr eyle
- 2 Cigerde gamzen okın oda yakayın hele ben  
Senün-de her ne elünden gelürse var eyle
- 3 Güneş dutulduğun iy mâh görmek isterisen  
Benefşe zülfünü gün yüzde târumâr eyle
- 4 Yüzün çevürdi hoş itdi rakîb cevvründen  
Var indi her kişiyi kendüzüne yâr eyle
- 5 Harâb-ı cânı diler sen imâret eyleyesin  
Gönülde ıskı esâsını üstüvâr eyle
- 6 Cihânda isterisen iy gönül hayât-ı ebed  
Ayagı toprakına baş u cân nisâr eyle
- 7 Biri-de gül yüzünü Adnî bigi vasf idemez  
Gerekse bülbülü bâğunda sad hezâr eyle

#### 69

mefülû fâilâtü mefâilü fâilün

- 1 Gülşenden usanur ruhına bir nigâh iden  
Kimdür güneş yüzi varırken meyl-i mâh iden
- 2 Haddinde zülfî muztarib olduğu tan degül  
Hiç âteş üzre dinlene mi câygâh iden
- 3 Kurtılmadı saçında gözinden gönül gerek  
Kim fitneden emîn ola şâmı penâh iden

- 4 Âşıklarun günin şeb-i târ eylemek diler  
Âyînesine gün yüzünün karşı âh iden
- 5 Dilber yolında cân u cihân terkini urup  
Hâr olsun it gibi heves-i izz ü câh iden
- 6 Anber saçuna müşk-i Hıtâ hem-demüm dimiş  
Bu lâfdur cihânda yüzini siyâh iden
- 7 Gün gibi tâc-ı fark-ı ser-i âsmân olur  
Başına ayagun tozin iy meh külâh iden
- 8 Ger cürmise mahabbetün iy hûr Adnî'yi  
Öldür kim oldur arada evvel günâh iden

#### 70

mef'ûlû / mefâîlün mef'ûlû / mefâîlün

- 1 Mihr-i ham-ı ebrûsı kaddümi dü-tâ itdi  
İyd ayı gibi beni engüşt-nümâ itdi
- 2 Baş virmegidi borcum yolunda bi-hamdi'llâh  
Boynumdan anı gamzen tîgıyla edâ itdi
- 3 Ayırdı dil ü cânı bend-i ham-ı zülfinden  
Yolında gele bana bu işi sabâ itdi
- 4 Kesb itdi bekâ milkin bu menzil-i fânîde  
Cânân yolına ol-kim cânını fidâ itdi
- 5 Hadd ü lebi şevkinden gülşende benüm bigi  
Hûnîn-dil olup gonce gül çâk-ı kabâ itdi
- 6 Katl iylemiş it gibi agyârı eşiginde  
Eydün kolına kuvvet hoş vardı gazâ itdi
- 7 Adnî demidür cânı dildâra nisar eyle  
Baş oynamaga çün-kim yolında salâ itdi

#### 71

mefâîlün feilâtün mefâîlün feilün

- 1 Gönül imâreti gamdan harâba yüz dutdı  
Cihânı seyl-i yaşum uçdan uca düz dutdı
- 2 Çü tîr gamzesi iy dil nişân idindi seni  
Hoş ol ki devlet ü ikbâl sana yüz dutdı
- 3 Yaşı çoğ ola ki fûrkatde gönlümi gamdan  
Unutmadı kereminden kulag u göz dutdı
- 4 Gurûrıla yüzün ayına benzerem diyeli  
Zevâl irişdi güne benzer âhumuz dutdı
- 5 Yolında başunu vir Adniyâ nasîhat işit  
Sa'âdet ol kişinün kim cihânda söz dutdı

#### 72

mefâilün / mefâilün mefâilün mefâilün

- 1 Nigârâ çeşme-yi cândur zülâl-i la'l-i şîrînün  
Sevâd-ı dîde-yi dildür hayâl-i hâl-i müşkînün
- 2 Görelden dür dişün nazmıyla cânâ tal'atun nûrın  
Gönülde kalmadı bir zerre mihri mâh u pervînün
- 3 Mu'anber zülfüne irmek meger sevdâ idindi kim  
Cihânı post-pûş olup tolaşur nâfesi Çîn'ün
- 4 Ümîd-i zülfünile kılca kaldı gönlümün cânı  
Demidür dut elini kim ayaga düşdi miskînün
- 5 Hadeng-i gamzesi çün-kim gelür cân kasdına her dem  
Gönül hoş geç ki vardur himmeti sana nigârînün
- 6 Gönül almakdur işün hüsn iline şâh olalıdan  
Cihânda müstedâm ol kim ne hoşdur resm ü âyînün
- 7 Dilermiş Adni'nün cânın peşîmân olmasun diyü  
Du'â hengâmıdır iy dostlar vaktidür âmînün

73

mefûlü fâilâtü mefâilü fâilün

- 1 Şâd olmak isteyen gamıla mübtelâ gerek  
Âlemde saltanat taleb iden gedâ gerek
- 2 Âh itdügümçe cûşa gelür gözlerüm yaşı  
Deryâ temevvüc itmege lâ-büd hevâ gerek
- 3 Dil milkinge hayâlün ider hükm geh gamun  
Bu bir harâbeye ne iki pâdişâ gerek
- 4 Gamzen hadengi zahmına cân virdügüm bu kim  
Derd-i dil-i şikesteye yârâ devâ gerek
- 5 Zühd ü salâhı câm-ı meye satdugum budur  
Kim rind olanlarun ameli bî-riyâ gerek
- 6 Kanlu çıkardı yaşımı yolum basar diyü  
Evvel bu işi işlemege dest ü pâ gerek
- 7 İzün tozına Adni yüzün niçe sürmesün  
Kanlu gözine sıhhatiçün tûtiyâ gerek

74

mefâilün feilâtün mefâilün feilün

- 1 Gören kamer yüzünü meyl-i âfîtab itmez  
Soran şeker lebüni yâd-ı la'l-i nâb itmez
- 2 Gönül imâretini yıkmasun gamun hazer it  
Ki kimse kendü evin göz göre harâb itmez
- 3 Cefâ vü cevriye iy bî-vefâ oran oldu  
Kişi bu vechile kanlusına azâb itmez

- 4 Benüm bir agladugum yüzüme urur ne aceb  
Anun hezâr cefâ itdüğün hisâb itmez
- 5 Gözün ki kanuma tîz atdı gamzesin yâ Rab  
Niçün bu hayr işi te?hîr ider şitâb itmez
- 6 Meger ki çihresi âyînenün demürdendür  
Ki gün yüzünle mukâbil olup hicâb itmez
- 7 Zamân mı var ki lebün nukli yâdına Adnî  
Ciger kebâb gözi yaşını şarâb itmez

## 75

fâilâtün fâilâtün fâilâtün fâilün

- 1 Çıksun ol göz kim yaşı derd ile hûnîn olmaya  
Görmesün şâdî yüzün her dil ki gamgîn olmaya
- 2 Ger murâdun cânısa al dek yüzüme togru bak  
Bu meseldür her ne dilde kîn ola dîn olmaya
- 3 Lezzet-i kevserde söz yokdur velî zu'mum bu kim  
La'l-i şekker-bâr-ı cânân bigi şîrîn olmaya
- 4 Gül yüziyle kâmet-i dil-cûy-ı cânân variken  
Gülşen içinde ne gam ger serv ü nesrîn olmaya
- 5 Hûblık milkine sultân olmaga lâyıık degül  
Her ne cânân-kim ana dilberlik âyîn olmaya
- 6 Zülf-i cânâna hatâdur anberi benzetme kim  
Bir kılına kem-bahâ bin nâfe-yi Çîn olmaya
- 7 La'l-i dür-bârun hayâliyle yaşı kanından âh  
Dem mi var kim Adnî'nün etrâfi rengîn olmaya

## 76

mef'ûlü mefâilü mefâilü feûlün

- 1 Handân degül ol dil ki derûnında gamun yok  
Lezzet ne bilür cân ki teninde elemün yok
- 2 Cân almazısan nâzıla bârî acı söz vîr  
Şîrîn dilün olsun sanemâ çün keremün yok
- 3 Bir lahzada nâ-hak yire bin kana girersin  
Müşkil budur itdüğüne dahı nedemün yok
- 4 Şükr iyle ferâgatle dilâ sıhhat ü emne  
Hûn-ı cigerün var n'ola ger câm-ı Cem'ün yok
- 5 Ey dil sıfat-ı zülf ü ruhın niçe yazarsın  
Güliden varak u sünbül-i terden kalemün yok
- 6 Bî-vechdür öykünme güneş yüzine iy mihr  
Çün gül yanagun la'l-lebün gonce femün yok



- 7 Kâr iylemez iy vâ'iz-i bârid bize pendün  
Taş hod degülüz ger varısa germ demün yok
- 8 Ol serv-kaddün sîm-berün sevgüsün anma  
Adnî bigi çün rûy-ı zer ü çeşm-i nemün yok

77

fâilâtün fâilâtün fâilâtün fâilün

- 1 Gül yüzünden ayru düşdüm gülsitânı n'eylerem  
Sensiz iy ârâm-ı cân cân u cihânı n'eylerem
- 2 Eşigünde mâcerâsın gönlümün arz itmege  
Gözlerüm yaşından özge tercemânı n'eylerem
- 3 İki âlemde yüzünden gayra ger kıla nazar  
Kana gark idüp gözümü bir gör anı n'eylerem
- 4 Leblerün yâdına cânâ dem-be-dem nûş itmege  
Hûn-ı dil varken şarâb-ı ergavânı n'eylerem
- 5 Lâle vü sahrâ nedür iy gülbün-i bostân-ı nâz  
Gün yüzün olmazsa mâh-ı âsmânı n'eylerem
- 6 Cânı kurbân iderem didükçe dil sayd itmege  
Gamze vü ebrû yiter tîr ü kemânı n'eylerem
- 7 Âdninün bülbül bigi efgânıla zikri bu kim  
Gül yüzünsüz lâle-yi bâg-ı cinânı n'eylerem

78

mef'ûlû fâilâtü mefâilü fâilün

- 1 Cevr ü cefâsı cân u dil-i mübtelâyadur  
Kismet ezelde buyıdı minnet Hudâ'yadur
- 2 Dil meyl-i zülf ider yüzi yâdına itsem âh  
Günden hevâ çü germ ola matlûb sâyedür
- 3 Bîm-i gözinden agzına sırrıla iy gönül  
Varmak ne vakte dek ola baş aç belâya dur
- 4 Dil alsa çeşmi gamze vü ebrûya sarf ider  
Türk'ün ne bulsa verdügi okıla yayadur
- 5 Olmaz beşer bu resme meger sana iy melek  
Gün mâder ü Kamer peder ü Zühre dâyedür
- 6 Hecr-i lebünle tîguna düşse gönül ne tan  
Cân nez'i irse her kişinün meyli mâyadur
- 7 Cevrile şâd ider dil-i gamgîn-i Adnî'yi  
Bilür ki meyli derdi olanun devâyadur

79

mef'ûlû fâilâtü mefâilü fâilün

- 1 Dilden cihânda her kime kim cân u ser gerek

Gamzen okına sînesi yârâ siper gerek

- 2 Teşbîh idermiş özini yâkût la'lüne  
Hakkâ bu işi itmege taşdan ciger gerek
- 3 Anber saçun hevâsına dilden düşenlere  
Hindûstân diyârına cânâ sefer gerek
- 4 İnanma zülfi ahdine cânânun iy gönül  
Bir başı var u bin dili andan hazer gerek
- 5 Gönüm kapıldı çeşmine zahmıla cân çeker  
Hûn-rîz ü meste uyana bundan beter gerek
- 6 Hattı hayâli gitmedi dilden ne turfedür  
Âteş içinde bitmeye reyhân-ı ter gerek
- 7 Adnî bigi muhibleri ol mâh-çihrenün  
Mahşer güninde bî-dil ü cân kopsalar gerek

80

mefâilün feilâtün mefâilün feilün

- 1 Terahhum it dile cânâ ki bî-karârundur  
Esîr-i silsile-yi zülf-i tâbdârundur
- 2 Müdâm gönlümi mey-gûn lebün hayâliyle  
Harâb u mest kılan çeşm-i pür-humârundur
- 3 Gönül ugurlığına mâh-tâba karşı gelen  
Siyâh câme geyüp hâl-i müşk-bârundur
- 4 Nihâl-i tûbi vü kevser didükleri bilürem  
Bülend kaddünile la'l-i âbdârundur
- 5 Meh-i melâhat ü necm-i sipihr-i hüsn ü kemâl  
Cihân içinde bu gün haddün ü izârundur
- 6 Gerek vefâ vü gerek cevriye cefâ kılsun  
Şikâyet itme gönül ihtiyâr yârundur
- 7 Safâyıla gam-ı şâdî-fezâsın iy Adnî  
Gönülde cân bigi sakla ki köhne yârundur

81

mefûlû fâilâtü mefâilü fâilün

- 1 Haddünde cilve kılalı tâvûs-vâr zülf  
Komadı canda sabr u gönülde karâr zülf
- 2 Çün müşk-i Çîn'e sehville teşbîh eyledüm  
Âşüfte oldu hışmıla kuşandı mâr zülf
- 3 La'lüne el uzatdı meger mest-i nâziken  
Kim düşüp ayaguna ider i'tizâr zülf
- 4 Pür-sünbül oldu seyl-i yaşımdan cihân yüzi  
Bârân-ı cevriye yagduralı ebr-vâr zülf

- 5 Devr-i kamerde fitne-yi çeşmünden incinüp  
Ey yüzi gün hatun bigi dutdı kenâr zülf
- 6 Yagmâ kılalı hüsn ilini hatt leşkeri  
Gamdan boyandı karaya mâtem dutar zülf
- 7 Adnî bigi ne denlü ki barmak toladılar  
Miskîn degül mi itmedi terk-i diyâr zülf

## 82

mef'ûlü mefâilü mefâilü feûlün

- 1 Bin yıl taleb it cânıla bir yâr ele girmez  
Dilber bulunur yâr-ı vefâdâr ele girmez
- 2 Agyâr cefâsın çekelüm yâr için iy dil  
Çün bâg-ı cihânda gül-i bî-hâr ele girmez
- 3 Vir cân u cihân nakdin ü hâk-i kademin al  
Kim buncılayın assılu bâzâr ele girmez
- 4 Çün cânı tabîb itdi ciger-hasta vü nâlân  
Derdâ ki devâ-yı dil-i bîmâr ele girmez
- 5 Her zerrede var pertev-i hurşîd-i cemâli  
Âlemde velî tâlib-i didâr ele girmez
- 6 Şîrîn lebünün râzını cânıla gönülden  
Sordum niçe kez vâkıf-ı esrâr ele girmez
- 7 Bu derdile kan aglasa Adnî yiridür kim  
Agyârıla pür oldı cihân yâr ele girmez

## 83

mefâilün feilâtün mefâilün feilün

- 1 Kemend-i zülfi ki cân boynına selâsildür  
Belâ-yı akl-ı perîşân u âfet-i dildür
- 2 Hevâsı gitmeye âsânlığıla gönlümden  
Kişiye terk-i vatan şek degül ki müşkildür
- 3 Gözüm yaşı ser-i kûyunda hâk olup sürinür  
Terahhumun yiridür kim yetîm ü sâyildür
- 4 Bülend kâmetüne râstı budur iremez  
Egerçi serv-i sehî-kad cevân u kâbildür
- 5 Miyân-ı nâzûkine mû didüm tebessüm idüp  
Didi ki ehl-i nazar işbu kîle kâyildür
- 6 Hezâr cânıla zencîr-i zülfünü göricek  
Cünûna meyl kılur her ne dil ki âkildür
- 7 Güneş yüzüne nazar mâh zerre idüğine  
Fürûg-ı şem'-i ruhun azherü'd-delâyildür

- 8 Görinmese ne aceb gün yanagı zülfinden  
Mehün müşâhedesine sehâb hâyildür
- 9 Huzûr kalmadı Adnî'nün eşk-i çeşminden  
Ne çâre eyleye çün-kim belâ-yı nâzildür

**84**

fâilâtün fâilâtün fâilâtün fâilün

- 1 Anberîn zülfün ham idüp gün yüzine sâye sal  
Lutfile miskîn kemendün halkasını aya sal
- 2 Lâle ruhsârunda zülfün sünbülünü tagıdup  
Gülşene reyhân-ı terden iy perî pîrâye sal
- 3 Tîr u ya tîgıla kasd-ı cânıçun zahmet neden  
Bir nefes bu hıdmeti derd-i dil-i şeydâya sal
- 4 Tîr-i gamzeyle ciger kanın gözümden dökdüğü  
Anun içündür ki dirler iylik eyle mâya sal
- 5 Sâhil-i çeşmümde yaşum kirpügüm üzre çıkup  
Hâr u hasdan gör ne bî-cândur ider deryâya sal
- 6 Sıhhat ü emn ü ferâgat hâsıl iken iy gönül  
Yok yire kim-dir sana kim kendüni gavgâya sal
- 7 Kimse mi vardur sana kavlünde yalansın diye  
Adnî'yi ha durmadın sen va'de-yi ferdâya sal

**85**

fâilâtün fâilâtün fâilâtün fâilün

- 1 Zülfün ucından dil ü cânâ belâ eksük degül  
Serv-kaddün hasretinden gözde mâ eksük degül
- 2 La'l-i dür-bârun hayâli hem-dem-i cân olalı  
Çeşm ü gönlüm arasında mâcerâ eksük degül
- 3 Tâb-ı dilden âhum anup çeşmüme varur hayâl  
Sâhil-i deryâda bilür kim hevâ eksük degül
- 4 Merhem urma hasta gönlüm yarasına iy tabîb  
Derdidür matlûb olan yohsa devâ eksük degül
- 5 Pâyâmâl-i zülfi iken dest-gîr olsa gözi  
Tan degül her gûşede merd-i Hudâ eksük degül
- 6 Hâsılum ıskunda iy dilber sorarsan rûz u şeb  
Cânda sûz u sînede âhıla vâ eksük degül
- 7 Gâh hecr ü geh rakîbinden çeker cevri ü cefâ  
Adniyâ her kanda ise bir belâ eksük degül

**86**

mef'ûlû fâilâtü mef'âilü fâilün

- 1 Cânân mahallesinde ne dil kim gedâ degül

Milk-i cihâna mâlik ise pâdişâ degül

- 2 Dür bigi sırrını sadef-i dilde sakla kim  
Nâ-geh kulagina irişür az belâ degül
- 3 Derdün bes ola hecrüni itme havâle kim  
Ma'lûl-i vâhide iki illet revâ degül
- 4 Her bir kılnda yüz dil-i âşüfte cân çeker  
Bin başlu ejdehâdur u zülf-i dü-tâ degül
- 5 Ol mihr-i mâh-çihreye dil oldu müştêrî  
Kim bir kılına iki cihân kem-bahâ degül
- 6 Cân virürem küdüreti zâyil ola diyü  
Çok yaşayasının dahı gönli safâ degül
- 7 Bin cânı al bir öpmege lutf it didüm didi  
Yok yire zahmet itme kim olur du'â degül
- 8 Adnî şikâyet eyleme cevrenden ol mehün  
Yârun cefâsı mihr ü vefâdur cefâ degül

87

feilâtün feilâtün feilâtün feilün

- 1 Dil-i âvâre yiler yil bigi ârâm itmez  
Terk-i sevdâ-yı ser-i zülf-i dil-ârâm itmez
- 2 Gice zülfini kamer tal'atına perde idüp  
Gün mi var âşıkının subhını kim şâm itmez
- 3 Cân dahı istese âsânıdı teslîm velî  
Müşkil olur dilegi neydüğün i'lâm itmez
- 4 Lutf idem dimişidi durmadı peymânına âh  
Ne günâh eyledüm ihsânını itmâm itmez
- 5 Göz karasıyla gönül zülfine tolaşsa ne tan  
Her ki dîvâne ola fîkr-i ser-encâm itmez
- 6 Hâr olup it bigi ta'zîm iderem müdde'îye  
Dahı eydür ki bana izzet ü ikrâm itmez
- 7 Adniyâ gam yime cevriye helâk ide diyü  
Bî-vefâyısa ne var kendüyi bed-nâm itmez

88

mefûlü fâilâtü mefâilü fâilün

- 1 Serv-i sehî egerçi ki pür-i'tidâl olur  
Tûbâ boyun nihâline kaçan misâl olur
- 2 Meh gün yüzüne bedr oluban gördi benzemez  
Kaşuna öykünem diyü lâ-büd hilâl olur
- 3 Zülf-i dü-tânı başun içün tap sal ayaga  
Kim bir kılnda bin dil ü cân pâymâl olur

- 4 Hâl-i lebün yüzünde görelden inanmışuz  
Kim cennet içre sâki-yi kevser Bilâl olur
- 5 Devr-i ruhunda zülfüne kılsa nazar hakîm  
Mümkin m'idi ki diye teselsül muhâl olur
- 6 Her katre hâl kim kalem-i sun'dan tamar  
Levh-i ruhunda nokta-yı cîm-i cemâl olur
- 7 Gül yanagına lâleyi benzetme Adniyâ  
İtme bu işi kim sebeb-i infî'âl olur

89

mefûlû fâilâtü mefâilü fâilün

- 1 Dil murgı düşdi çün-ki kara zülfün agına  
Konmaz dahı cihânda ferâgat budagina
- 2 Yaşumdan özge görmedi hecründe hem-dem âh  
Çendân ki bakdı kanlu gözüm sol u sagına
- 3 Zülfün ki la'lüni tolaşup dıtrer üstine  
Meryem-durur ki îsâ'yı almış kucagina
- 4 Her şûha cân virür gözümün merdümü dirîg  
Anı diler ki su koya kendü ocagina
- 5 Kaddün hevâsı ile za'îf itdi servi kim  
Yirde dayanmayınca duramaz ayagina
- 6 San-kim güneş yüzinde Sühâ âşikâr olur  
Çün katre-yi arak gele ol meh yanagina
- 7 Dür dişlerine lâle-yi manzûmı Adniyâ  
Teşbîh itme nâ-geh irişür kulagina

90

mefûlû fâilâtü mefâilü fâilün

- 1 Dil murgı saydına kuralı kara zülfi ag  
Gül yüzi şevki cânâ urur lâle bigi dâg
- 2 Şeb-reng zülfini ruhi altında görelî  
Bildüm ki karanu görünürmiş bün-i çerâg
- 3 Kaddün hevâsıyla düşer yire za'fdan  
Andan-durur ki serve ider bâgbân dayag
- 4 Bâg-ı ruhını murg-ı nazardan sakınmaga  
Asmış başı aşaga ayagından iki zâg
- 5 Hurrem-dil olayın dirisen gül gibi müdâm  
Nergisleyin çemende elünden koma ayag
- 6 Redd eylemiş rakîb-i siyeh-rûyî yârumuz  
Olsun iki cihânda yüzi ag u işi sag

- 7 Derd ehlinün dinürdi ki yanmak durur işi  
Köz oldu şimdi Adni ya kime asa kulag

## 91

fâilâtün fâilâtün fâilâtün fâilün

- 1 Cân u başa kalmasun âlemde cânân isteyen  
Mübtelâ olsun gönülden derde dermân isteyen
- 2 Tâlib-i cennet olan itsün ser-i kûyın makâm  
Zülfinün küfrini dîn edinsün îmân isteyen
- 3 Hâk-i pâ-yı dilberi cânıla elden komasun  
Hızr bigi zulmet içre âb-ı hayvân isteyen
- 4 Yüzi devrinde göze dâyim teselsül görünür  
Zülfine kılsun nazar bu kavle burhân isteyen
- 5 Zahmet-i cevrin çeker her kim diler cân râhatın  
Hem-dem idinür gamın gönlini şâdân isteyen
- 6 Lâle-veş sahn-ı çemende komasun elden ayag  
Gülsitânda kendüyi gül gibi handân isteyen
- 7 Mâh-rûlar mihrine Adnî bigi itsün heves  
Cân u dil ma'mûresin cevriye vîrân isteyen

## 92

feilâtün feilâtün feilâtün feilün

- 1 Ne revâdur yine agyârı sana yâr idesin  
Niçe bir iy büt-i Âzer beni âzâr idesin
- 2 Bî-vefâyıduguna cümle cihân şâhiddür  
N'ola ger hükmile sen yok diyü inkâr idesin
- 3 Yıkduğun yitmedi mi ıyş u tarab hânesini  
Ki gamun dahı gönül milkinge mi'mâr idesin
- 4 Niçe bir bagrumuzı kan idesin cânuniçun  
Demidür hasta gönül derdine tîmâr idesin
- 5 Gamzesi tîgı eger cân dileye boynunı dut  
Ey gönül olmaya kim başuna bir kâr idesin
- 6 Râstı kâmet ü haddi variken vech degül  
Heves-i serv ü hevâ-yı gül ü gülzâr idesin
- 7 Adniyâ kıymetüni bilmedi çün terkini ur  
Bî-vefâyıla ne lâzım satu bâzâr idesin

## 93

mef'ülü mefâilü mefâilü feülün

- 1 Bu gonce-yi nev bir gül-i handân olacakdur  
Dil bülbülü şevkiyile nâlân olacakdur
- 2 Şol vechile kim nâza ider şimdiden âgâz

Küfri saçmun âfet-i îmân olacakdur

- 3 Ol dogdugı dem çerh-i melâhatda didüm kim  
Yılduzlar içinde meh-i tâbân olacakdur
- 4 Âb-ı deheni katresi her kanda tamarsa  
Lutfiyle nebât anda kamu cân olacakdur
- 5 Gonce dehenin yâra kaçan ide teşebbüh  
Bu hiç degül yok yire bühtân olacakdur
- 6 Dil bildi ocagına gözümlü koyduğımı su  
Agladugum oldur arada kan olacakdur
- 7 Çün düşdi mahabbet eline yakası cânun  
Ma'mûre-yi dil âh ki vîrân olacakdur
- 8 Ey men' kılan Adni'yi ol hûr-ı cinândan  
Aklun nereye gitdi bu kaçan olacakdur

94

mefâilün feilâtün mefâilün feilün

- 1 Yüzinden açsa nikâbın çemende ol gül-i nâz  
Niyâza başlaya mânend-i bülbül ehl-i niyâz
- 2 Çün irdi zülfine dil gün yüzinde devlet anun  
Ki hâsıl iyledi devr-i kamerde ömr-i dırâz
- 3 İşitmedi ser-i zülfinde dil figânını âh  
Egerçi gicede dirler uzak gider âvâz
- 4 Cihânı garka virür göz yumunca seyl-i yaşum  
Sehâb-ı zülfi çü bârân yirine yagdıra nâz
- 5 Hezâr dūd kopar bir dem içre cânumdan  
Lebinde bitmege çün hattı ıleye âgâz
- 6 Figân idüp niçe aglamayam bu sūzıla kim  
Yaşumdan özge degül kimse âhuma dem-sâz
- 7 Nigâr sırrını fâş itme Adni düşmene kim  
Degül zamâyir-i erbâb-ı kîne mahrem-i râz